

HEADLINES (MORNING)

1. Chawngte a tlawmngai pawl in zawm khawm Joint NGO te chuan tun hnaia Chakma Autonomous Dist Council huamchhunga hnalak chungchangah dikna aiin Politics inrawlhna avangin harsatna a thleng mek a ni an ti .
2. Congress Thalain Vairengte atanga Aizawl Kawngpui chhia chu sorkarin mutthluk sana an vil that tawh loh vangin hetiang harsatna hi Mizoramin a tawh ta ni, an ti.
3. Mizoram Universal Health Care Scheme kalpui a nih hnuah ZMC&H tih changtlun hna ngawrh takah kalpui mek a ni .

<><><>

CHAWNGTE PROTEST

Chawngte a tlawmngai pawl in zawm khawm Joint NGO te chuan tun hnaia Chakma Autonomous Dist Council huamchhunga hnalak chungchangah dikna aiin Politics inrawlhna avangin harsatna a thleng mek a ni an ti a, hemi chungchangah sorkar nen tha taka inbiakna a kal theih loh avangin nimin khan zirna In te an khar.

Joint NGO thuchhuah tarlan danin kumin May 19 – 23 inkar chhunga Block Resource Centre, Kamalanagar, Chawngte (CADC area bik tân) a thawk tûr Samagra Shiksha, Mizoram Foundational Stage Helper leh PM SHRI Music Instructor, Sports Instructor leh Hindi Instructor tûr Interview kaltlanga lâk chungchângah Joint NGO Chawngte chuan diklo taka hnalâk a awm ngeia a hriatna an nei a, interview Board member te pawhin dik tak leh fair taka a thiam leh phû te ngêi lâk an tum laiin, CADC ZPM District Headquarters President, Pu Karan Dewan, leh a thawhpui te'n he hnalâkah hian an duhsak zâwngte hnaa lâk an nih theih nân party chakna hmangin hma an la a, Recommendation List siamin Interview Board member te hnênah an duhsak zawng la tûrin Recommended List an thehlût a, an recommended list za a za titling tûrin an nawrlui zui bawh a ni.

ZPM Party, District Headquarters, CADC hruaitute chuan an duhsak zâwng za a za la tûr leh chutiang an tih loh chuan transfer an nih tûr thu thleng a tawngkâa Board member an lo vau tawhna bawhzuina nia ngaih theih tûrin Pi Juhnee Chakma, Interview Board Member Secretary, BRC, Kamalanagar, Chawngte-a attached a awm mêk chu June 25 khân a post ngaia awm tûrin Repatriate Order tihchhuah anih thu an sawi a, Joint NGO Chawngte chuan Pi Juhnee Chakma Transfer anih dânah hin thil dik lo a awm ngei a ni tih a hria a, Interview Board member te ngêi pawhin an chhia leh tha hriatna hmang ngam lo khawpa Political Pressure an nei a ni an ti.

Joint NGO Chairman, Pu Joseph Lalchhingpuia chuan Pi Juhnee Repatriate order chu sut turin Mizoram Sorkar an ngen thu sawiin, thu lawmawm chhanna an dawn loh avanga lungawilohna lantir an nih thu a sawi.

Joint NGO te hmalaknaah hian Sorkar school 23 leh Private school 12 a zirlai 6123 in nimin khan zirna an chhunzawm thei lova, chawhma chung school kawta an ven hnuah boruak muanawm tak hnuaiah Joint NGO te hi an tin ta a ni.

<><><>

CM

Chief Minister Pu Lalduhoma'n nimin khan a pisa ah Aizawl City Local Council Association hruaitute kawmin Aizawl khawpui ralmuang zawka siam a pawimawh thu a sawi.

Chief Minister hian Aizawl chu hmun ralmuang taka siam tul a tih thu sawiin Tleirawl rual, midang sualrawn ching te an awm nia a hriat thu sawiin tihtawp a tul thu a sawi a, khawlai chu zurui emaw buaina siam chingte lakah fihlim se a duh thu sawiin Nunau leh hmeichhe tan pawha hmun ralmuang taka siam a ngai a ti a, Local council ten mahni area theuhah, tlawmngaipawlte nena tang tlanga hma la turin a ngen tih sawiin ILP dan lek kawh kawngah Local Council te tanpuina an mamawh thu sawiin No Objection Certificate pekchhuah kawngah fimkhur turin a hrilh bawh.

Local Council Association hruaitute hian an lawmman tihsan chungchang leh Aizawla an office hmun ve tur te Chief Minister hi an sawipui a. Chief Minister hian an dilna te a lo zirchiansak tur thu a chah a ni.

Local Council Association hian Chief Minister Relief Fund-ah cheng sing khat an chhunglut nghal a ni.

<><><>

MAMIT

CSR atanga Mamit District Hospital-in dialysis khawl a dawn te chu Mamit Bialtu MLA Pu H.Lalzirliana hmalaknain nimin khan Mamit District Hospital building tharah dah luh a ni a, hman theih tura hmalak nghal a ni.

CSR atanga Mamit District Hospital-in dialysis khawl pali a dawn zing a pahnih Serchhip hospital-ah lak a nih hnu a khawl pahnih la awm Champhai hospital-ah lak chhuah leh turin thuneituten order an chhuah chu, All NGO Mamit chhuah phallovin a dahna building kawngka an kalh hnan a, Mamit district hospital building tharah Dialysis khawl thar hmang thei tura khawl buaipui tur hian nimin khan Mamit Bialtu MLA chuan Mamit-ah Technician a hruaia, an inpeih hnuah a khawl buntu tur technical hruai a ni leh dawn niin MLA chuan a sawi.

Mamit All NGO chuan bialtu MLA hmalakna leh inpeknaah lawmthu sawiin, Mamit district hospital a mi tur Dialysis khawl sorkarin a lak chhuah tawh chu a rang thei ang ber a dah let turin sorkar an ngen nghal tih an sawi a ni.

<><><>

CONG PR

Congress Thalai chuan Vairengte atanga Aizawl Road, Khamrang - Sairang kawng dinhmun an enfiah a, PWD Minister Pu Vanlalhlana'n he kawng hi Mizoram PWD mawhphurhna a ni lo tih a sawi chu thudik lo, NH 06 package 8 (Kawnpui - Khamrang) phei chu vawiin thlenga Mizoram PWD enkawl a la ni zawk an ti.

MPYCC Pu Laltawnliana chuan Vairengte atanga Sairang inkar chu kumin January - May thla chhung khan fur ruahtui tlak huna Mizoramin harsatna a tawh loh nan hmanhmawh zawka kawng siam hnathawk turin kawng siamtute nen thingpui inhona tum thum neih a ni tawh tih a sawi a. Tun tumah pawh kar kal ta ni 24 atang khan Team thumah insiamin Vairengte leh Sairang kawng dinhmun chu uluk leh zuala hnathawh dan leh harsatna thlen dante zirchian leh a ni tih sawiin, Pu Laltawnliana chuan, harsatna thleng thei laka an ngenna hrang hrang te sorkar leh a changtu PWD Minister-in an mutthluk sana an vil that tawh loh vangin hetiang harsatna hi Mizoramin a tawh ta ni, a ti a, PWD Minister hian he kawng pawimawh chhe lutuk a mawhphurhna ni lo anga a sawi hi thil zahthlak leh mawhphurhna hre miah lo a ni tih a Chiang a ti.

ZPM sorkar hian Lal hrim hrim tum avangin kum 15 daih Kawng siam turin nasa takin an inzuar a, an sorkar hnuah thal vawi hnih rei tawh a thlen hnu pawha an ngaihsak tawh loh avanga mipui tawrhna hrang hrang hi thleng a ni a ti a. Lirtheia eizawngtute leh he kawngpuiin a kal tlang khua te mangang tlawmngaia kawng siam hnatlang an nei fo pawh zak miah lova PWD Minister-in, kawng chhia hi mipuiin a tihchhiat emaw an ti, tia ZPM Office-a fiamthu zawnga a la zui te hi a thlangtu mipui palzutna dik tak a ni, a ti.

MPYCC President chuan ZPM sorkarin kawng chhe siam chu sawi loh, kawng tha sa pawh an tichhia tih sawiin, Mizoram chhung kawng khawi lai pawh zawh hleih theih loh khawpa chhia, Motor tlu leh tang, damlo, zin vek vak leh nitin hnathawktute harsatna a thleng nasa tawh a ti a. Diesel leh Petrol-a chhiah September 2024 - March 2025 chhunga ZPM sorkarin mipui a rawkna Road Maintenance cess atan chhiah cheng vbc 23 nuai 43,01,800 an khawn chu khawiahnge a awm a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

ZMCH

Mizoram Universal Health Care Scheme kalpui a nih hnuah Zoram Medical College & Hospital (ZMC&H) tih changtlun hna ngawrh takah kalpui mek a ni a, nimin khan Health Minister Pi Lalrinpuii an hmalakna hrang hrangte a endik a ni.

Health Minister chuan Medicine Ward, khum 26 awmna chu naktuk a nih loh pawhin a hma thei ang bera hman hman tan nghal ni se a ti a, Gynaecology Ward, khum 10)awmna pawh hman tan nghal a nih tur thu a sawi bawk.

Cabin 10 awm thinah MUHCS kalpui a nih hnuin Cabin 10 hawn belh a lo ni tawh a, vawiin vek khan cabin 10 dang hawn belh leh niin Cabin 10 dang leh pawh hawn leh thuai tura ruahman nghal a ni.

Orthopaedic Ward khum 26 awm thinah khum 30 dah belh a ni a, Nausen pianghlim enkawlna, Neonatal Intensive Care Unit (NICU) pahnih (2) hawn a ni bawk a, a hmaa lo awm tawh sa nen tun dinhmunah NICU hi pariat (8) a awm mek a ni.

Pediatric Intensive Care Unit (PICU) leh Integrated Care Unit (ICU) awm tawh bak hawnbelh tum mek a ni a, Inzaina hawn belh tum a nih bawk a ni.

Thawktu indaih lohna phuhru turin MUHCS Multitask Worker mi 20 leh Casual Nurse 64 lak thar an ni tawh a, heng bakah hian Junior Resident (JR) lakna tur buaipui mek a ni bawk.

<><><>

BJP PRESIDENT

Mizoram State BJP President thar Dr. K. Beichhua an BJP Mizoram in a tum ber chu Viksit Mizoram siam a, Mizoram tih hmasawn a ni a ti a, an hma thlir lian ber chu Mizote inpumkhatna siam te, Mizoram chu Christian state a nih anga christianna chawikan a venhim tlat chu Mizoram BJP thil tum a ni a ti.

Dr. K. Beichhua hian nimin khan chanchinbu mite Atal Bhawan, Aizawl ah a kawm a, BJP chuan Mizoram chu a hniam ber atanga chak taka thuam that a tum bakah thingtlang lamah pawh unit din belh zel an tum thu a sawi a, Mizoram a BJP party chu kristianna dodal tu party ni a miin an sawi thin chu a dik tawklo a, BJP chu developmental vision nei a hma la mek tu party a ni zawk a ti.

BJP State President thar chuan, tun dinhmunah Mizoram BJP ah Unit 327 an awm mek thu sawiin member in enroll pawh an pun belh zel a ti a, mi sing 7 vel member in ziaklut an awm tawh a ti.

Dr K Beichhua chuan Assembly inthlan hnuhnung berah khan sawrkar laipui hruaitu ten Mizoram an lo tlawh tumin, Mizoram mamawh thlen turin an ti a, an demand siam pawh MLA a seat an chan chuan an tih hlawhtlin sak tur thu an intiam tih sawiin, sawrkar laipui in tiamna bawhzui a Special assistance MADC tan dilna an thehlut a, Sawrkar laipui hotute pawhin a hmun ah ngei an tlawh hnuah Project sawm chuang siam a DPR pawh an thehluh nghal thu a sawi a, heng zingah hian Project paruk cheng nuai sang sarih man hu vel chu PMJVK kaltlangin approved a ni tawh a ti a. Heng project implementing agency tur chu MADC a ni dawn a ti.

Heng bakah hian 6 Schedule amendments North Eastern State Autonomous council ten an demand chu tih hlawhtlin niin committee pawh din nghal a nih thu he hun ah hian Dr K Beichhua chuan a sawi.

He hunah hian, State sawrkar a BJP a sawrkar loh avanga miin state sawrkar a hrek thin anga sawi thin chu a hriat ve loh thu Dr K Beichhua chuan a sawi a, Mizoram ah development a chhiat chuan ram hruaitu anih angin a tuartu a nih ve tho tur thu leh State sawrkar ah chuan tupawh sawrkar se development ah hrek tura hma alak loh tur a sawi a. Hetih laiin sawrkar laipui zawmpui -alliance state ah te erawh chuan hmasawwna chu a zuanin a zuang a ni a ti a, Mizoram erawh chu Sawrkar laipui alliance state anih ve chiah loh thu a sawi a ni.

<><><>